

Тіл үйрену талпынғанға оңай

2-бет



Тасжол талапқа сай ма?

4-бет



Сыдықтың сазын ұмытуға бола ма?..

5-бет



1931 жылдың 4 қазанынан бастап шығады

# ОРТАЛЫҚ ҚАЗАҚСТАН

ҚАЗДАУЫСТЫ ҚАЗЫБЕК БИ: СӨЗДІҢ АТАСЫ – БІРЛІК, АНАСЫ – ШЫНДЫҚ  
ҚАРАҒАНДЫ ОБЛЫСТЫҚ ҚОҒАМДЫҚ - САЯСИ ГАЗЕТИ

www.ortalyq.kz www.instagram.com/ortalyq.kz/

СЕНБИ, 17 ТАМЫЗ, 2024 ЖЫЛ №92 (23 414)

www.facebook.com/ortalyq.kz/ info@ortalyq.kz

• ТІЛ-ТҰҒЫР

## Лингвистикалық лагерь – тың жоба

Тіл үйренемін деушілерге биыл Қарағандыда тұңғыш рет мәдени-лингвистикалық лагерь ашылды. Ниет білдірген қатысушылар қазақ тілін үйренумен бірге ұлтымыздың салт-дәстүрімен танысты. Бұған мемлекеттік тілді оқыту бойынша тегін курстардың 15 тыңдаушысы қатысып, бес күн бойы дәріс алды. Лагерь «Бәйтерек» демалыс аймағы базасында өткенін атаған жөн. Жазғы лагерьді ұйымдастырушы – Қарағанды облысының тілдерді дамыту басқармасы.



Ішкі істер органдарының зейнеткері отставкадағы подполковник Лилия Авхадеева – мәдени-лингвистикалық лагерьде қазақ тілін оқыту курстарында алған білімдері мен сөйлеу дағдыларын шындағандардың бірі.

– Тіл үйрену лагерінде бес күн бойы қазақ халқының тілі мен мәдениетін зерттедік. Ұлттық тағамдарды дайындадық. Оны әзірлеу кезінде сөздік қорымызды толықтыра түстік. Қазақ тілінде ән шықпап, музыкалық аспаптармен және ұлттық киімдермен таныстық. Қазақ тілін оқытудың мұндай форматы жиі пайдаланылып, көп адамдар осындай лагерьге бару мүмкіндігіне ие болғанын қалаймын, – дейді Лилия Авхадеева.

Қазіргі уақытта Қарағанды облысында алты оқу орталығы және қазақ тілін оқыту бойынша түрлі клубтар жұмыс істейді.

Өз тілшімізден

## Табыс пен салық: өзгеріс кезеңі

Қазақстан Республикасының Президенті Қасым-Жомарт Тоқаев Үкіметтің кеңейтілген отырысында салық салу жүйесін реттеп, жетілдіру керектігін айтты.

Ерканат КЕҢЕСБЕКҰЛЫ,  
«Ortalyq Qazaqstan»

### Мемлекет басшысының межесі

– Қазақстанда түпкі мәні өзгеріп кеткен қосылған құн салығының өзін реформалау қажет. Оны 12 пайыздан 16 пайызға дейін көтеру мәселені шешпейді. Сарапшылар қосылған құн салығын көтеру көлеңкелі экономиканың үлесін арттырып, инфляцияның өсуіне әкеп соқтыруы ықтимал деп орынды пікір білдіріп жатыр. Бұл қадам еліміздің инвестициялық тартымдылығына да кері әсер етуі мүмкін, – деді Президент.

Бұл орайда Мемлекет басшысы табыс пен мүлікке салық салудың жаңа жүйесі енгізілмесе, кәсіпкерлер де табысын қалтаға баспай, бизнесін дамыту үшін жұмсауға ынталандырылмаса, арнайы салық режимдері өзгермесе, бұл міндет көздеген үдеден шықпайтынын меңзеді. Сондықтан, Салық кодексі секілді стратегиялық маңызы бар құжатты әзірлеуге осы сала мамандарынан бөлек экономистер мен бизнес өкілдері жұмылдырылуы қажеттігі назарға алынды. Әрине, бюджет қоржынын толтыру міндетін ұмытуға болмайды. Экономика неғұрлым қуатты болса, соғұрлым көп салық түседі деген қағидатты берік ұстану керектігін де ескертті Қасым-Жомарт Тоқаев.

Ал, осы жылдың I шілдесінде Мемлекет басшысы «Салық және бюджетке төленетін басқа да міндетті төлемдер туралы» Қазақстан Республикасының



Реформа – өміршең өзгерістер

Кодексіне (Салық кодексі) және «Салық және бюджетке төленетін басқа да міндетті төлемдер туралы» Қазақстан Республикасының Кодексін (Салық кодексі) қолданысқа енгізу туралы» Қазақстан Республикасының Заңына өзгерістер мен толықтырулар енгізу туралы» Қазақстан Республикасының Заңына қол қойды.

### Салық мәдениеті хақында

Халық пен салықтың арасындағы жайттарды бір нақтылап, таразылап алмақ ниетпен облыс бойынша мемлекеттік кірістер департаментінің басшысы орынбасарының міндетін атқарушы Алданыш Адамбековке жүгінген едік. Алданыш Мейірханұлының сөзінше, құзырлы мекеме тарапынан салық және кеден заңнамасының нормаларын түсіндіру бойынша тұрақты жұмыс жүргізілуде. Президент ұсынған салық реформаларының Қазақстандағы экономикалық және әлеуметтік ахуалды айтарлықтай жақсартуға әлеуеті жоғары. Алайда, оны табысты іске асыру халық пен бизнестің әртүрлі топтарының мүдделерін ескеруді, сондай-ақ, бақылау мен әкімшілен-

дірудің тиімді тетіктерін құруды талап етеді. Реформалардың кешенді сипатқа ие болуы әрі тұрақты дамудың ұзақ мерзімді мақсаттарына қол жеткізуге бағытталуы маңызды. Бұқара халықты ағарту жолында салық мәдениетінің қалыптасқандығы өзекті.

– Жалпы, республикамыздың әрбір тұрғынының алдында тұрған ең толғақты тақырыптардың бірі – жергілікті салық, мүлік салығы, жер салығы және жеке тұлғалардың көлік құралдарына салынатын салық тақырыбы дер едік.

► 3-бет

• «QARAGANDY HALF MARATHON 2024»

## Мақсаты биік марафон

«QARAGANDY HALF MARATHON 2024» дәстүрлі жартылай марафоны 18 тамызда, сағат 08:00-де «Қарағанды-Арена» мұз сарайының алаңында өтеді. Айта кетейік, марафонға 2500-ге жуық адам тіркелген.

Марафонның басты мақсаты – саламатты өмір салтын насихаттау және халықты дене шынықтырумен, спортпен белсенді түрде айналысуға баулу, қашықтан жүгіру әуесқойларының шеберлік деңгейін арттыру, мықты спортшыларды анықтау, достықты нығайту.

Марафон жас аралығына байланысты алты қашықтыққа бөлінеді.


Жарысқа қатысу үшін онлайн-тіркелуден өтіп, төлем жасау міндетті. Тіркелу қатысушылар саны 3200 адамға жеткенде аяқталады. Төлем нөмірі 15-17 тамыз аралығында таратылды.

9-17 жас аралығындағы қатысушыларда жартылай марафонға қатысу барысында ережеге сәйкес ата-аналарынан электрондық рұқсат қағазы мен бала денсаулығы жайлы қолхат болуы керек.

Таңдалған қашықтықты жүргіргісі келетіндердің барлығы qaragandy-halfmarathon.kz ресми сайтына тіркеліп, бастапқы жарнаны төлеуі тиіс. Жарысқа мүмкіндігі шектеулі жандар да қатыса алады. Ал, скандинавиялық жүру жарысынан 86 жастағы егде марафоншы қатысып, бағын сынады.



Жарысты бастау алаңы. 2024 жылдың 18 тамызы күні Б.Әшімов көшесінің учаскесі (С.Сәпиев атындағы бокс орталығының алаңы) жабылады



Жүгірушілерге ыңғайлы болу үшін әртүрлі жерлерінде QR-код орналастырылады. Оның көмегімен әр марафоншы өз нәтижесін бірден біле алады.

Марафонға тек Кеншілер өлкесінен ғана емес, сонымен қатар, Астана, Алматы және Павлодар қалаларынан, тіпті, Ресей, Украина, Қырғызстаннан келген жалайқтар да қатысады.

Мен қала тұрғыны ретінде жыл сайын марафонға қатысамын. Спорт – денсаулық кепілі. Сондықтан, спортпен шұғылданып, саламатты өмір салтын ұстану

маңызды. Мен бұл марафонда 21 шақырым қашықтықта жүгіруден бақ сынаймын. Қатысушыларға тек қана сәттілік тілеймін, – дейді қатысушы Демжан Серікбай.

Облыстық дене шынықтыру және спорт басқармасының ұйымдастыруымен өтетін жартылай марафон қатысушылары әр қашықтық бойынша естелік медальдармен, бағалы және ақпалай сыйлықтармен марапатталады.

Аружан СЕРІКБАЙ

ВАЛЮТАЛАРДЫҢ РЕСМИ БАҒАМДАРЫ:

• EUR/KZT 526.91

• USD/KZT 478.57

• RUB/KZT 5.40

• CNY/KZT 66.86

Қазақстан Ұлттық Банкінің 16 тамыз, 2024 жылғы дерегі бойынша













